



Waarom Christus waarlik God is

In Nederland het die bekende en berugte (sinodaal) gereformeerde teoloog, prof H M Kuitert, onlangs weer 'n opspraakwekkende boek, Jesus, de nalatenschap van het Christendom, die lig laat sien as deel van sy deurlopende pogings om die Christelike geloof te ondermyn en die Bybel te reduseer tot 'n mensgemaakte boek vol stories. Oor internet het ds. A Bogaards 'n paar leersame opmerkings daarvoor gemaak en wel as volg:

Die boek van Kuitert het ek nog nie gelees nie. Wel wil ek graag 'n antwoord gee op die vraag of die Bybel self aanduidings gee dat Christus waarlik God is:

Reeds van die begin af het die menings oor Jesus uiteengeloop. Op Jesus se vraag "*Wie sê die mense dat Ek, die Seun van die mens is?*" was daar sommige wat gesê het dat Hy een van die profete of miskien Johannes die Doper is (Matthéüs.16:13-14). 'n Gewone mens dus. Daarteenoor staan die belydenis van Petrus (vs.16): "*U is die Christus, die Seun van die lewende God*".

Met sy belydenis gaan Petrus in teen die heersende opinie. Jesus is vir hom veel meer as net 'n gewone mens. Hy is die Seun van God. Wat Jesus Petrus dan antwoord (vs.17-18), is van besondere belang:

Eerstens spreek Hy Petrus salig. Dus: hier het ons 'n belydenis wat alles met ons saligheid te make het.

Tweedens sê Jesus ook wat die herkoms daarvan is: "*...vlees en bloed het dit nie aan jou geopenbaar nie, maar my Vader wat in die hemele is...*". Dus: die belydenis van Jesus se Godheid kom nie uit onself op nie, maar die Vader moet dit aan ons openbaar en ons oë daarvoor open.

Derdens verklaar Jesus: "*...op hierdie rots sal Ek my gemeente bou...*". Die rots is die belydenis van Petrus. Dit is die fondament van die kerk. Daarop staan die kerk vas. Wie daaraan torring, ruk die fondament onder die kerk uit en ontnem homself die enigste vastigheid wat hy het as kerkmens. Dit is nie vreemd dat die Satan aan hierdie belydenis sal probeer torring nie: dit is slegs omdat die kerk daarop staan dat die poorte van die doderyk dit nie sal oorweldig nie.

Deur die eeue heen het die kerk verskillende bewyse uit die Woord aangevoer om aan te toon dat Jesus waarlik God is:

- Hy het Goddelike *Name*. In Johannes 1:1 word die Woord (dit is Jesus) uitdruklik God genoem. Jesaja (9:5) verklaar dat die Kind wat gebore sal word, Sterke God genoem sal word. Verder is Hebreërs 1:8 nog van belang, waar van die Seun gesê word: "*U troon, o God, is tot in alle ewigheid...*". Thomas sê vir Hom "*My Here en my God*" (Johannes 20:28).
- Hy doen Goddelike *werke*: die skeppingswerk word aan Hom toegeskryf (Johannes 1:2); ek dink verder aan al sy wonderwerke, wat 'n mens tog nie kan doen nie.
- Hy het goddelike *eienskappe*: Hy is alomteenwoordig (Matthéüs 28:20 "*...Ek is met julle tot aan die voleinding van die wêreld*").
- Jesus ontvang Goddelike eer: ons moet in sy Naam gedoop word (Matthéüs 28:19), in Hom glo (Johannes 14:1) en in aanbidding voor Hom neerbuig (Filippense 2:10). Dit is alles eerbewyse wat alleen God toekom en waaruit ons kan aflei dat die Seun self God is.

Die mikpunt of doel van Johannes se evangelie is om ons te help om te bly glo dat Jesus die Christus is, die Seun van God (*Nog baie ander tekens het Jesus voor sy dissipels gedoen wat in hierdie boek nie beskrywe is nie; maar hierdie is beskrywe, dat julle kan glo dat Jesus die Christus is, die Seun van God; en dat julle deur te glo die lewe kan hê in sy Naam. Johannes 20:30, 31*). Om dit te bewys, vertel Johannes van Jesus se tekens. So belangrik is dit dat ons dit sal glo dat Johannes verklaar dat hierdie geloof "lewe" (ewige lewe) beteken. Wie daarenteen nie glo in die Naam van die eniggebore Seun van God nie, is reeds veroordeel (Johannes 3:18). Die suiwer belydenis is 'n saak van lewe of dood, salig of rampsalig.

Jesus eis van ons 'n antwoord: "*Maar julle, wie sê julle is Ek...?*" (Matthéüs.16:15). Die "julle" word herhaal om te benadruk: hier is 'n saak waarin ons nie neutraal kan bly nie. Christus eis van sy kerk 'n antwoord.

Attie Bogaards

© 2015

www.christelikemedia.org